



# DE LOCIS THEOLOGICIS

## THESES NONNULLAE

SAPIENTIAE DEI INCREATAE,  
AETERNO VIDELICET EJUS VERBO,  
PER SANCTAM IPSIUS GENITRICEM,  
BEATAM VIRGINEM MARIAM

S A C R A E:

ATQUE IN REGIA, HISPALENSI SCIENTIARUM  
A C A D E M I A

KALENDIS OCTOBRIS,

ANNO AB ILLIBATAE VIRGINIS PARTU

M.DCCC.XIX.

V E S P E R E.

A B. D. GREGORIO MATAMOROS,

D. D. FERDINANDO GONZALEZ, BAÑOS,  
Arenzana, Sacerdote in eâ Artium Magistro, Sa-  
crae Theologiae Doctore, eorundemque Locorum  
explanationi Praefecto,

SUPPETIAS ILLI FERENTE

PRO SOLEMNI STUDIORUM INSTAURATIONE

T U E N D A E.

HISPALI : TYPIS REGIIS.

homine apprehendi neutiquam, vel omnino sciri aliter queant, nisi ex Dei revelantis auctoritate, tum Ecclesiae proponentis, seu declarantis, quae a Deo extant revelata. In his itaque in fidei obsequium intellectus procul dubio est captivandus, nec curiosae inquisitioni relinquendus locus. » Nobis curiositate opus non est, eleganter agebat Tertullianus, » (1) Christum Jesum, nec inquisitione » post Evangelium, cum credimus, nihil » desideramus ultra credere. Hoc enim » prius credimus non esse, quod ultra » credere debeamus. « Scripturam autem, et Traditionem Apostoli Ecclesiae commiserunt, ut utramque fideliter custodiret, ad posteros transmitteret, interpretaretur, explicaret. Quia verò, Paulo teste: (2) » Oportet et haereses esse « ; idem tidem in Ecclesia extitere, qui traditam a Christo, et Apostolis veritatem suis erroribus adulterarunt; adversus quos, ut fidei suae integritatem Ecclesia servaret,

---

(1) Lib. de Praescript. c. 8.

(2) Ep. 1. ad Cor. c. 11.

saepius Episcopos convocare coacta fuit, qui ex Dei verbo, tum Scripto, tum Tradito, quid fidelibus esset amplectendum, proscriptis erroribus, in Synodis definire. Romanus insuper praelucet Pontifex, Petri succesor, cui Ecclesiae cura, et fidei Depositum custodia praecaeteris concredita venit, cum inter Episcopos Primatum obtineat. Nunquam etiam Divina providentia desiit in Ecclesia doctrina et sanctitate conspicuos excitare viros, qui ad fidelium aedificationem fidei, ac morum dogmata explanarent, suisque illustrarent commentariis, vel ea adversus errores, ac haereses tuerentur : quod peractè Sancti Patres adimplere. Fuere praeterea Theologi Scholastici, qui ex Sacris litteris, ex Conciliorum, et Summorum Pontificum decretis, ex Patrum scriptis, ex aliisque praecipua, quae ad sacram pertinent doctrinam, capita collegere, atque in ordinem rede gere, eademque rationibus firmarunt, illustrarunt, illorum argutias redarguentes, qui aut fidei, aut morum dogmata sophismatibus labefactare sunt aggressi. In fidei, ac Theologiae subsi-

dium vocanda etiam humana Philosophia, et ratio, nonquidem ut domina, et magistra, ad cujus normam, et nutum Religionis capita sint definienda; sed ut ancilla, et serva, quae dominatrici fidei subserviat, non praesit; eam dilucidet, ac defendat, non regat. Plurimum denique ad doctrinam ab Apostolis et Patribus traditam servandam Historia inservit, qua Summorum Pontificum, et Episcoporum in Ecclesia successio, Conciliorum, et Sedis Apostolicae definitiones ac decreta, Haereticorum, haeresumque ortus, et damnatio, resque caeterae in Ecclesia vel Republica gestae recensentur.

Jam verò de istorum natura locorum, vi, proprietatibusque in tot partes, quot eorum tenet numerus, singillatim agemus. Quae omnia, si praecipuis conclusionibus, quoad poterimus, demonstrabimus, erit toti nostro operi satis, superque factum. Utinam perficiamus, ut nostrum adimplentes munus, in nostrae tot titulis insignitae Academiae resiliat ornamentum. Faveat itaque Deus!

## CIRCA THEOLOGIAM GENERATIM

PRAELIBANDA.

**T**heologiam, attenta nominis etymologia, idem ac sermonem de Deo esse, voces graece Deum, et sermonem latino idiomate redditae satis conficiunt. Qui de Deo est sermo, vel solo naturae lumine nititur, vel ex simplici, et nuda revelatione habetur, vel per discursum ex revelatione deducitur. Si primum, sermo ille Theologia nuncupatur naturalis; hujusmodi verò extitit Dei, rerumque Divinarum cognitio imperfecta, quam nonnulli Philosophi gentiles olim compararunt, et nunc etiam comparant Metaphisici. Si secundum, ille de Deo sermo virtus est Theologica, quae fides dicitur; per fidem nempe veritatibus propter Dei auctoritatem revelantis mens adhaeret. Si tertium, idem ille sermo habitus est, qui purè et sine addito Theologia appellatur. Quam rectè ducimus definitam, verbis D. Augustini (1) inhaerentes, eam videlicet disciplinam, „qua fides saluberrima, „quae ad veram beatitudinem ducit, gignitur, „nùtritur, defenditur, roboratur.” Ipsius objectum, versandae materies Deus ipse est, tum in se, tum ut rerum principium, ac finis est omnium. Et Divinae naturae notitia primarius quasi intuitus; morum autem ad honestatem in beatitudinem institutio, secundarius. Eaque sapientia, et scientiarum omnium est praestantior, dig-

---

(1) Lib. 14. de Trinitate, c. 1. n. 3.

[ VIII ]

nior, utilior, et secundum substantiam spectata, toti Ecclesiae absolutè necessaria, licèt non singulis hominibus.

Quanquam speculatrix, et practica Theologia nostra sit, de Deoque universa agat, multifariam esse dicitur, quod multis, variisque modis ipsum rimetur atque consideret; nam praeter recensita; quae credenda proponit, Dogmatica. Quae agenda persequitur, Moralis. Quae Pastores animarum efformat, Pastoralis. Quae vero fidei defensores instituit, Polemica vocitatur. Quia in explicandis his omnibus certa methodus valet observari; ideo si in fidei capitibus explanandis, moribus dirigendis, dogmatibusque propugnandis Theologia fusiori, et oratorio stylo procedat, uti Patres consuevère, Positiva. Si autem Dialecticae ope presso stylo, et certa metodo res fidei, et morum exponantur; Scholastica appellatur Theologia; in qua conclusiones ex revelatis justo ratiocinio deductae, et quae illustrandis fidei dogmatibus lucem afferre possunt, rejectis inutilibus concertationibus, pertractantur. Denique saeculo quinto, postquam libri Sancti Dionisii Areopagitae nomine insigniti, de quorum auctore Critici hodierni jure ac merito dubitant, apparuerunt, nomen Theologiae Symbolicae, et Mysticae primum audiri coepit: illa sacra Symbola, sive notas rerum figurate Divina repraesentantium explicat, et mysteria sub illo figurarum cortice contenta enucleat. Mysticam verò, quae christianae perfectionis regulas tradit, in Deumque affectus movet, appellare consueverunt.



Duo sunt Theologiae principia, ex quibus cuncta oriuntur argumenta; Ratio, et Revelatio: haec primas, illa ultimas partes habet: plura et praestantiora ab auctoritate mutuatur; proprius enim ipsius locus est: huic rationes tanquam hospites et peregrinae accedunt, obsequuntur, atque subserviunt: appositè ad rem aiebat Augustinus: (1) „Quamobrem ipsa quoque animae medicina, quae Divina Providentia, et infallibili beneficentia geritur, gradatim distinctèque pulcherrima est. Distribuitur enim in auctoritatem, atque rationem. Auctoritas fidem flagitat, et rationi praeparat hominem. Ratio ad intellectum, cogitationemque perducit. Quamquam neque auctoritatem ratio penitus desserit, cum consideratur, cui sit credendum.” Et alio in loco: (2) „Nihil in Ecclesia Catholica salubrius fieri, quam ut rationem praecedat auctoritas.” Nec vero inscii sumus, quibusdam sedes illas, sive locos, aut fontes, unde principia Theologica hauriuntur, octo esse numero, partim quinque, nonnullis tres, aliis duo: sed eam hisce partitionibus praeponendam existimamus, quae a Melchiore Cano, Theologo videlicet praestantissimo, est facta: ut decem illi sint fontes: Sacri nempe Libri, Divina Traditio, Ecclesia, Concilia, Apostolica Sedes, Sancti Veteres, Scholae Theologi, Ratio deinde naturae, Philosophi, Historia humana. Quorum priores duo propria, et legitima Theologiae initia complectantur: tres

---

(1) Lib. de vera Relig. c. 24.

(2) Lib. de Morib. Eccl. catol. c. 25.

postremi externa, et aliena : quinque demum interjecti aut principiorum propriorum inter-  
prætationem, aut eas, quæ inde nascuntur, con-  
sequutiones respiciant. Jam de illis singulatim  
agamus.

### DE SCRIPTURA SACRA.

Errores innumeri, quos, ut testatur Chrysos-  
tomus, (1) de Supremo Ente protulit Philoso-  
phia, quæ sola nitebatur ratione; alii circa agen-  
da, credenda, assequenda, circa cultum Deo tri-  
buendum, et poenitentiam ei propter noxam  
praestandam, benemultique alii a præstantissi-  
mis viris editi, licet Divino quodam ingenio præ-  
diti, quia tamen illis revelationis lumen non  
affulsit, ipsiusmet necessitatem adstruunt. Quæ  
révelatio in Veteris et Novi Testamenti libris  
dubio procul continetur, ut in omni laude dig-  
nissimis Ignatii, Polycarpi, Iraenei, Justini, Ate-  
nagoræ, Tertulliani, Origenis, aliorumque pro  
Religione Apologiis innumeris hanc veritatem  
statuentibus argumentis refertis apparet.

Est igitur Scriptura Sacra Dei Verbum ip-  
so afflante Sacris Scriptoribus, ab istisque litte-  
ris in Veteris et Novi Testamenti libris con-  
signatum. Qui quidem libri, etsi illorum parti-  
tionem in Proto et Deutero-Canonicos non res-  
puamus, septuaginta duo, Concilio Tridentino  
definiente, hodie dum sunt, omnesque ab Spiri-  
tu Sancto inspirati, ut Apostolus Petrus his pro-  
fitemetur verbis: (2) » Spiritu Sancto inspirati lo-

---

(1) Hom. 5. in 1. Ep. ad Cor.

(2) Ep. 2. c. 1. v. 21.



„quati sunt Sancti Dei Homines.” Hinc clare deducitur, cum Dei sint universa verba in laudatis libris contenta, Divinae atque infallibilis auctoritatis esse: „Est enim Deus verax.” (1) De quaestione autem illa magno animorum aestu in Scholis agitata an eodem modo omnia, quae in Scripturis habentur, Deus Sacris Scriptoribus inspiraverit, decidere nihil nostra interest, dummodo nec in minimis Sacer Scriptor labi potuerit, nec lapsus fuerit: nam aliàs, „ajante Augustino: (2) „Tota Scripturarum vacillaret auctoritas, ideoque et fides nostra.”

Vetus Testamentum ferè totum Haebraica, Syriaca, Chaldaica linguis proditum fuisse; Novum verò ferè universum Graeco idiomate esse prolatum apud omnes constat; inde nata est quaestio summo conatu versata, nunc originales ejusmodi extent incorrupti: ita extitisse Christi, Apostolorum, Hieronymi, Augustinique temporibus indubium est, Salvatore nostro Judeos ad „scrutandas Scripturas” mittente; quod minime faceret, si illi corrupti fuissent, et Augustino his „verbis confitente: (3) „anne, inquit, credibile est ipsos codicibus suis voluisse eripere veritatem, ut nobis eriperent auctoritatem, vel per totum orbem dispersos potuisse in hoc conspire nullo contradicente?” Postmodum a fidei nostrae inimicis depravatos incredibile judicamus: in eos tamen multa menda irrepsisse compertum

(1) Paul. ad Rom. 3. v. 4.

(2) Lib. 1. de Doct. Christ. c. 27.

(3) Lib. 15. de Civ. Dei. c. 13.

est: ideo Vulgatam latinam editionem, quam initio quinti, aut fine quarti saeculi editam conjicimus, magnaque ex parte Hieronymo interpretanti aut corrigenti adscribimus, in rebus ad fidem et mores pertinentibus amplectimur; ea namque ipsa est, qua utimur, quamque prae innumeris latinis editionibus probavit, utque authenticam Tridentina Synodus declaravit: (1) quin ideo negaverit, nec originalibus concesserit auctoritatem, nec ad illos recurrendum prohibuerit. Aliquos licet momenti levis errores in vulgata nostra adhuc reperiri nullus ignorat.

Celeberrima ubique terrarum facta est versio Septuaginta ex illorum numero, qui eam confecerunt, sic appellata: ex Hebraeo in Graecum, vel Pentateuchum, vel libros, qui tunc in Hebraeorum canone reperiiebantur, circa Ptolomaei Philadelphi Aegypti Regis tempora verterunt, quae quidem omni tempore authentica permansit, etsi quaedam menda in ea inveniantur.

Diversis in linguis ferè innumerae in lucem prodire Sacrae Scripturae versiones, quae Vulgares nuncupantur: quibus quidem asentiendum, dummodo cum Vulgata conveniant. Quod qui legat, videbit statim, Ecclesiam hos libros ut Canonicos declarasse: equidem jure et merito: ejus tantum munus est: tritissima sunt illa Augustini verba: (2) "Evangelio non crederem, nisi me commoveret Ecclesiae catholicae auctoritas." Nec ergo ad ipsammet Scripturam, nec ad privatam

(1) Sess. 4. cap. 2.

(2) In Ep. fundam. c. 51.

cujusvis opinionem, nec ad testimonium, aut intrinsecam humani spiritus persuasionem, ac suggestionem, nec ad hominis rationem in hoc iudicio est adeundum.

Hunc Sacrum codicem, a D. Joanne in Apocalipsi visum septem sigillis signatum, et a Chrysostomo quaestionum abissum appellatum majori ex parte obscuritate plenum esse, adversus Lutheranos, impiè de se praesumentes, statuimus.

Variis sensibus, litterali, hocque in proprium et improprium, seu Metaphoricum diviso; et Mystico, in Tropologicum, seu moralem, Anagogicum, ad Ecclesiam Triunfantem attinentem, et Allegoricum, Militantem nempe spectantem partito Sacram conflari Scripturam pro comperto habemus. Et unamquamque litteram jam unico sensu litterali, jam multiplici; jam et litterali, et mystico, hocque vario posse gaudere, ipsiusmet Scripturae altitudo, et auctoritas exigunt. Ex litterali efficax semper, et firmum desumitur argumentum; cum a Spiritu Sancto directè intentum esse constet; ineluctabile etiam mysticus aliquando suppeditat; dum videlicet a Sacro Scriptore asseritur, aut per Ecclesiam declaratur. Sensus verò accommodatitius propriè Scripturae sensus non est. Sed de illa haec praelibasse sufficiat.

## DE TRADITIONIBUS.

Divinas existere Traditiones, quidquid ferè omnes haeretici calumnientur, res est luce meridiana clarior. His antiquos naturae lege Patriarchas,

(1) et Mosis Judeos, (2) et gratiae Christianos, (3) omni argumentorum genere, usos, rectos, ostenditur, maximamque fidem iisdem Traditionibus tribuisse patet. Veteris et Novi Testamenti Scriptura antiquiores fuerunt, ac ita necessariae, ut, ipsis ablatis, benemulta fidei nostrae dogmata his fundata corruant. Quaedam per ipsas tantum habemus, alia quae obscurè in Scripturis ab illis veniunt explicanda; nec Scripturas ipsas absque illis intelligere possemus, nec Divinas esse nobis constaret. Insuper, „omnem salutarem veritatem, et morum disciplinam, Concilio Tridentino teste, (4) Scripturis contineri, nec sine scripto Traditionibus, quae ipsius Christi ore ab Apostolis acceptae, aut ab ipsis Apostolis, Spiritu Sancto dictante, quasi per manus traditae ad nos usque pervenerunt,” firmissimum fidei dogma est semper creditum, ac propugnatum, ab eademque Synodo his statutum verbis: „Si quis traditiones praedictas sciens, et prudens, contempserit, anathema sit” : ubi non tantum eos percellit, qui Traditionum renuunt necessitatem, verum insuper illos, qui et illarum denegant existentiam.

Regulas ergo, ut Traditiones Divinae et Apostolicae ab Ecclesiasticis secernantur, a praeclarissimo Melchiore Cano, Tertulliani, Augustini-

---

(1) Gen. c. 18. v. 19.

(2) Deut. c. 32. v. 7.

(3) Ep. ad Thess. c. 2. v. 14

(4) Sess. 4.

que dictis innixo assignatas (1) in medium proferre operae pretium duximus. Quod universa tenet Ecclesia, nec Conciliis institutum, sed semper retentum est; nonnisi auctoritate Apostolica traditum certissimè creditur. Quod universi Patres per temporum successionem concordissimè tenuerunt, eique contrarium ut haereticum refutarunt, é litteris tamen sacris non accipitur, per Traditionem Apostolicam dubio procul recepit Ecclesia. Quidquid nunc in Ecclesia communi fidelium consensione existit probatum, quod humana potestas efficere nequivit, id ex Apostolica Traditione necessariò est derivatum. Si viri Ecclesiastici aliquod dogma, vel unam quamlibet consuetudinem uno ore testentur, nos ab Apostolis recepisse, ita credi debet." Quod ab Apostolis traditum Ecclesia illae credunt, ubi est integra, et continua ab illis successio, traditum revera est.

Traditiones hae ab Apostolis Ecclesiae communicatae ab ipsa fidelitèr sunt custoditae; et usque ad consumationem saeculi illibatae custodientur. Quatenus verò Apostolica sit Traditio, judicare ad illam quoque pertinet.

Multiplex Traditio consideranda venit, praeter quam quod in genere sit verbum sine scripto traditum, spectata penes suum Auctorem, alia extat Divina à Deo immediatè revelata, et scripto non tradita: alia vero Apostolica, quae ab Apostolis viva voce, non autem scripto, ad nos derivatur; si hae ab illis veniant ut imme-

---

(1) Lib. 3. c. 4.



diatis Christi preconibus, Apostolico-Divinae adiungunt: si autem ab ipsis, ut Ecclesiae Pastoribus, fluunt, Traditiones purè Apostolicae appellantur. Alia est demum Ecclesiastica, quae post Apostolos ab Episcopis fuit introducta, et consuetudine roborata. Ratione vero materiae, alia de fide, alia morum, alia disciplinae. Temporis ratione, perpetuae, et temporariae. Loci, una universalis, altera particularis. Quaedam denique de praecepto, quaedam de consilio. Sed de Traditione satis.

### DE ECCLESIA.

In Verbo Dei scripto, et tradito illa quidem continentur, quae credenda nobis Deus revelavit: verum cum Sacra Scriptura non ubique clara sit, sed interprete, et in controversiis circa fidem obortis iudice indigeat; cumque Traditiones Divinas à falsis discernere cuilibet pro suo nutu non competat, nisi tot Religiones, quot capita admittere velimus; sapientissimo Divini Numinis consilio factum est, ut nobis de hoc Interprete, et Iudice provideret, qui et obscura Sacrae Scripturae explicet, et veras Traditiones à falsis secernat, et Divinas veritates revelatas nobis credendas proponat. Hic Interpres, hic Iudex à Deo est constitutus vera Christi Ecclesia. Quae, praetermissa ejus etymologia, recte cum Bellarmino definitur: »Societas fidelium »baptizatorum, ejusdem fidei professione, eorundem Sacramentorum participatione, et eodem cultu inter se adunatorum, sub regimine legitimorum Pastorum ac praecipuè unius Christi



in terris Vicarii, Romani Pontificis." Ecce criterium, quo Ecclesiae membra dignoscantur. Itaque, qui baptizati adhuc non extant, veluti infideles publici, et catecumeni; qui à fide etiam publicè deviarunt, ut haeretici manifesti; qui iisdem Sacramentis non participant, sicut excommunicati; qui obedientiam legitimis Pastoribus denegant, ut schismatici; nullomodo inter Ecclesiae membra adnotandi veniunt. E contra verò, qui aliquando aeternos patientur cruciatus, qui venialibus, aut lethalibus immiscentur culpis, dummodò baptisma acceperint; externè fidem profiteantur; iisdem communicant Sacramentis; legitimisque subiciantur Pastoribus, membra Ecclesiae revera extant; ista namque, Augustino testante, (1) est velut quoddam corpus vivum, in quo anima est, et corpus; et quidem illam interna Spiritus Sancti dona, fides, spes et charitas constituunt: corpus autem externa fidei professio, et Sacramentorum communicatio. Ex quibus recte colligitur, aliquos ad animam et corpus spectare, alios verò ad istud tantum; hocque solummodò sufficere, ut illius corporis membra nuncupentur, sicut humani quaedam sunt membra, licet non viva. Procul abeant Wiclephitae, Husitae, Pelagiani, Donatistae, Catari, Lutherani praecipui, aliaeque hujus generis pestes, metaphoris à Christo usurpatis, ut Ecclesiam denotaret, convicti: Parabolae namque ipsae Retis, Agri, Virginum, aliaeque innumerae illos non excludunt, sicuti in rete boni et ma-

---

(1) In Breb. Collation. Collat. 3.

[ XVIII ]

li pisces continentur, usque quoad litus deveniatur : palea similiter in area cum tritico est conjuncta, donec ventilandi tempus accedat : in agro zizania tritico usque ad messem commiscetur : virgines denique fatuae cum prudentibus usque ad Sponsi adventum simul habitant; ubi et Patres, et Interpretes, et Theologicae rationes reprobos, peccatores, et imperfectos in Ecclesia contineri satis indicant.

Cum extra Jesu Christi Ecclesiam non sit salus: „Neque enim, teste Apostolo Petro, aliud nomen datum est sub Coelo hominibus, in quo oporteat, nos salvos fieri” : manifestè deducitur, illam conspicuam esse debere, ut cuicumque ingredi volenti pateat aditus. „Ecclesia quidem, inquiebat eleganter D. Cyprianus, Domini luce perfussa per orbem totum radios suos porrigit.” Cumque qui tam in credendis, quam in agendis erroribus deciperentur, neutiquam in salutis portum permeare valerent; clarè inde patet Ecclesiae indefectibilitas usque ad finem saeculi duratura in existendo, in credendo, in docendo; illi enim hoc Dominus per Oseam promisserat: (1) „Et sponsabo te mihi in sempiternum: et sponsabo te mihi in justitia, et in iudicio.... et sponsabo te mihi in fide, et scies, quia ego Dominus.” Ecclesia ergo est, nec peribit in aeternum, renuant licet illi, qui intra eam non sunt. Quae quidem in docendo infallibilitas ad Sanctorum beatificationem, et canonizationem, et ad facta dogmatica vocata, id est, si-

---

(1) C. 2. v. 19.

mul cum dogmate conjuncta, Jansenistis contradicentibus, rectè extendi debet, suoque judicio mentis et animi adhaesione, non verò solo religioso silentio, adquiescere tenemur. Illa insuper vel dispersa, hoc est, in suis Pastoribus separatim degentibus considerata, vel in Conciliis Generalibus coadunata, doctrinis assignatis, errare non valet; promissiones enim à suo Sponso ipsi factae hoc mirabiliter conficiunt: „Cum venerit Sion Redemptor..... ait Isaïas, (1) hoc foedus meum cum eis, dicit Dominus : Spiritus meus, qui est in te, et verba mea, quae posui in ore tuo, non recedent de ore tuo, et de rore seminis tui amodò, et usque in sempiternum.” Quin Haereticorum cavillationes adversus ejus indefectibilem auctoritatem obstant.

„Haereticis omnibus hoc gentile est, inquit Canus, (2) simul atque sese Ecclesiae auctoritate urgeri vident, aut illam spernere, aut Ecclesiae rem ad se nomenque transferre et eam in illis esse negare, in quibus revera est” : ideo assignandae necessariò veniunt notae quaedam, quibus vera Christi Ecclesia à falsis distinguitur; hae nullae aliae sunt, nisi quas Synodus Constantinopolitana enumerat : „Una, Sancta, Catholica, et Apostolica” : quae quidem sic Romanae Ecclesiae congruunt, ut immeritò Protestantium coetibus tribuantur : „Christus, ait S. Optatus Milevitanus, (3) Sponsus est unius

---

(1) C. 59. v. 20. et seq.

(2) Lib. 4. c. 1.

(3) Lib. 1. ante Medium.

„Ecclesiae, sicut in Canticis Canticorum ipse testatur, qui cum unam laudat, coeteras damnat.” Cum hucusque de Christi Ecclesia proprie dicta simus loquuti, circa ejus Auctorem, et antiquitatem quidquam proferre noluimus. Verumtamen, ne in hoc noxam aliquis nobis imputet, animadvertere opus est: Deum illius Auctorem fuisse independentiae, et supremæ auctoritatis potestate, solum vero Christum excellentiae et ministerii principalis facultate: „Attendite vobis, inquit Apostolus, (1) et universo gregi, in quo vos Spiritus Sanctus posuit Episcopos regere Ecclesiam Dei.” Et ipsemet Paulus alterum alio statuit loco: (2) „Adspicientes in Auctorem fidei, et Consummatorem Jesum, qui proposito sibi gaudio sustinuit crucem, confusione contempta.” Lato etiam sensu Ecclesiam non tantum Christi natalem antecessisse sed insuper ita legis naturæ, et scriptae temporibus floruisse, ut tunc Christianae Religionis cultores extitissent, Eusebius testis est, ait enim: (3) „Secundam tamen, rationemque vivendi non recentem à nobis compositam, sed jam inde à primo conditu generis humani, ab hominibus Deo acceptis institutam, atque excultam fuisse.” Tanquam probabilius cum Honorato Tournelyo (4) Ecclesiam, sensu exposito, ab Abele initium sumpsisse propugnamus. Verum de ejus stricto

(1) Act. c. 20. v. 28.

(2) Ad Hæbr. c. 12. v. 2.

(3) L. 1. Hist. c. 4.

(4) L. 3. Art. 3.

sensu acceptae antiquitate si sermo fuerit, Salvatorem nostrum eam instituisse; ab illius praedicationis tempore simul cum Synagoga viguisse; in ejus morte, illa abrogata, hanc invaluisse; factaque per orbem novae legis promulgatione, omnes obstrinxisse cum Augustino (1) tuemur. Sed de Ecclesia sufficiat. Ad Concilia propere-

(.) : **DE CONCILIIS.**

Quartus sequitur Theologiae Locus, quem Ecclesiastica diximus esse Concilia. Est autem Concilium, vel Synodus Sacerdotum maxime Episcoporum in locum aliquem, ut de rebus Religionem spectantibus agant, convocatio. Probabile admodum est, Concilia Divinae existere institutionis: ex Apostolorum enim Actis jam ab ipsis Ecclesiae crepundiis Concilia ab illis fuisse celebrata constat: (2) Istos verò aut ex Christi praecepto, aut speciali Spiritus Sancti motione illa convocasse est verosimillimum. Quatuor Synodorum genera passim distinguuntur: Generales, Nationales, Provinciales, Dioecesanae. Ex primis viginti duae legitimae in Ecclesia sunt habitae. (3) Generale namque Concilium intelligitur, ad quod omnes Ecclesiae universae Episcopi fuerint vocati, et quaedam istorum pars, quae illam representet, in eo adsistat. Horum, libertate quidem gaudentium, decreta, quae à Roma-

(1) Ep. 19. ad Hieronim.

(2) C. 1. 6. et 15.

(3) Schram tom. 1. Instit. Theol. §. 23. schol. 3.



no Pontifice, non verò tantum à suis Legatis, sint approbata, Spiritu Sancto illis adistente sunt effecta; proptereaque in fide, et moribus infallibilia : meritò namque ajunt Patres, quod et Apostoli: (1) „Visum est Spiritui Sancto, et nobis.” Deinceps haec decreta absque Summi Pontificis assensu robore carere praecipua Concilia testata sunt, ut inter alia Nicoenum primum ad Sylvestrum Papam his verbis: (2) „Quidquid constituimus, precamur, ut vestri oris „consortio CONFIRMETUR.” Ad quod quidem Sylvester rescribens: „Confirmo, inquit, figo- „que ad doctrinam vestram reclamantes de Uni- „tate Trinitatis.” Patres Concilii Chalcedonensis idem profitentur: (3) „Omnem, inquit, vo- „bis gestorum vim insinuavimus ad comproba- „tionem nostrae sinceritatis, et ad eorum, quae „à nobis gesta sunt, FIRMITATEM, ET CON- „SONANTIAM.” Et Leo M. ad quem haec sunt directa, sic illis respondet: (4) „Ne ergo dubi- „tabile videatur, utrum quae per unanimi- „tatem vestram de fide statuta sunt; approbem &c.” Scriptura tamen Sacra minime sunt: „Magna „enim conquisitio in illis facta est,” ut quaelibet res decideretur, qua certè Canonici Auctores neutiquam indignè.

Concilium autem Generale indicare, solius Summi Pontificis jure Divino est, quemad-

(1) Act. c. 15.

(2) Ep. ad illum.

(3) Ep. ad Leon.

(4) Ep. ad Conc. Chalced.



modum ipsi praesidere, nullumque legitimum extat Concilium, quod ab illis expressè, vel tacitè consentientibus non sit convocatum; id enim Capituli in Ecclesia Supremi munus exigit. Jure etiam Divino Episcopi tantum ut ut Apostolorum successores, decisiva suffragia in illis habent, Conciliorumque soli judices sunt, cum namque monachi et laici in Synodo Chalcedonensi jam laudata ingressi fuissent, clamarunt Patres: „Mitte „foras superfluos, Concilium enim Episcoporum est.“ Id insuper et Nicoeni et Chalcedonensis allata verba conficiunt: „Quidquid constitui- „mus“ &c. „Quae à nobis gesta sunt“ &c. Ex privilegiis tamen id ipsum Abbatibus, Ordinum Religiosorum Generalibus, et Cardinalibus est concessum. Princeps autem saecularis solum advocatae, seu externae protectionis jus exercet, quin aliud sibi meritò abrogare valeat. Omni memoria digna sunt Constantini M. verba ad Nicoeni Concilii Patres, ab Eusebio relata: (1) „Vos quidem in his, quae intra Ecclesiam, ego „verò in iis, quae EXTRA GERUNTUR, Epis- „copus à Deo sunt constitutus.“ Theologi siquidem ut merè consultores assistunt.

Huc referenda est illa multo tempore agitata quaestio de Concilii supra Pontificem auctoritate, quam post Calvinum, diversa tamen adducti ratione, alii pro virili parte tenuerunt: nos verò cum Duvallio Parisiensis Universitatis Doctore (2) asseveramus: „Opinionem de prela-

---

(1) Lib. 4. de vita Constant. c. 24.

(2) De sup. Rom. Pont. post, p. 4. q. 7.

„tione Conciliorum auctoritati Romani Pontificis  
 „à temeritate inobedientiae vix posse excusari;  
 „fovet enim, ut plurimum inobedientiam, et dis-  
 „sidia multa, magnosque tumultus semper in Ec-  
 „clesia excitavit”; proptereaue duximus res-  
 puendam.

Generalia celebrari Concilia utilissimum, et  
 licet non absolute; quodammodo necessarium ex  
 causis, quibus convocata sunt, liquet. Neque  
 omnia, quae in Conciliis habentur, fidei sunt  
 decreta; alia obiter, praeter institutum, explican-  
 di, vel ornatus causa in illis continentur, aliter  
 alia, quae, qui sancita iudicet, caecutit, alluei-  
 natur. Quaecumque autem varia, et diversa pro  
 temporum, et locorum varietate ab Ecclesia ge-  
 neralis statuatur disciplina, haec sedulo obser-  
 vanda. Quin et Conciliorum non ea mens us-  
 quam fuit, ut salutaribus alicujus Regionis, vel  
 Provinciae institutis, privilegiis, aut inveteratis  
 consuetudinibus nova velint decreta opponere,  
 sed contemperari. Synodorum Generalium legi-  
 bus, omnes Nationis, Provinciae, Dioecesis, sub-  
 diti tenentur obedire.

Particularia quoque Concilia, quae Ecclesiae  
 Summus Pontifex approbaverit, in fide et mo-  
 ribus erroris sunt immunia; non approbata, si-  
 tamen non rejecta, etsi certam fidem non fa-  
 ciunt, valde probabilem. Nationalia convocare,  
 et praesidere Patriarchae, vel Primatis; Provin-  
 cialia verò Archiepiscopi; Dioecesana denique  
 Episcopi munus est.

## DE SUMMO PONTIFICE.

Caput Ecclesiae principale Christus est, quod post suum in Coelum ascensum etiam remanet, ita ut in hoc munere in terris successorem non agnoscat. Hic enim ita in alterius succedit locum, ut alter non amplius retineat potestatem, qua antea fungebatur : Redemptor vero noster dum corporalem suam praesentiam Ecclesiae subtrahit, eandem conservat potestatem : manet ergo adhuc caput Ecclesiae primum. Et quidem dum in hac vita degeret, ejus caput visibile fuit, cum eam manifestè rexit : nunc autem in Coelis existens caput ejus est invisibile, per internum gratiae influxum illam gubernans; visibiliter vero per suum in terris Vicarium, qui loco sui jam absentis visibili praest Ecclesiae. Hoc caput à Christo D. Petrus unice fuit constitutus, qui proinde ab illo jurisdictionis et honoris tum supra Apostolos, tum supra caeteros Fideles primatum accepit, et qui ipsi in Romana Sede succedunt, Pontifices Romani. Porro adversarii, id est, Haeretici cum in aliis fere dogmatibus inter se, dissentiant, in hoc tamen omnes conveniunt, ut videlicet totis viribus, summaque animi contentione Romani Pontificis sedem oppugnent; nulli fuerunt hostes Christi atque Ecclesiae, qui simul contra hanc sedem bellum non gesserint. Ast cum ex Sacris litteris, et constantissima Ecclesiae Traditione satis, superque de hac potestativa Petri, ejusque Successorum praeminentia constet, hinc nervos om-

nes intendere debemus, ut adversus Ecclesiae inimicos pro veritate pugnemus. Ad primum quod attinet, unum, aut alterum audietis fundamentum : „Negare, inquit D. Optatus, non potest, scire te in urbe Roma Petro primò Cathedralam Episcopalem esse collatam, in qua sederit OMNIUM APOSTOLORUM CAPUT PETRUS.” (1) „Inter beatissimos Apostolos, aiebat Leo M. in similitudine honoris fuit quaedam discretio potestatis, et cum omnium par esset electio, uni tamen datum est, ut caeteris praeremineret.” (2) Hancce verò potestatem in Romanos Episcopos transiisse praeter innumeros testis est Ireneus, (3) qui sic se expedit : „Maxima, et antiquissima, et omnibus cognita... Romana fundata et constituta est Ecclesia. Ad hanc enim Ecclesiam propter potentiorē principalitatem necesse est omnem convenire Ecclesiam, hoc est, eos qui sunt undique fideles, in qua semper ab his, qui sunt undique, conservata est ea, quae est ab Apostolis Traditio.” Petrus Ecclesiae universalis Pastor institutus fuit, cujus successor Romanus Episcopus procul dubio est. „D. Petrum Apostolorum Principem post Episcopatum Ecclesiae Antiochenis, et praedicationem dispersionis eorum, qui de circumcisione crediderant, in Ponto, Galatià, Capadocia, Asia, et Bythinia, anno Claudii Imperatoris secundo, Romam perrexisse, ibi-

---

(1) Lib. 2.

(2) Ep. 84.

(3) Lib. 3. adv. Haereticos.

„que viginti quinque annis Cathedram Sacer-  
 „dotalem tenuisse, vitamque cum morte commu-  
 „tasse, ejusdemque Cathedrae successores tanquam  
 „suos reliquisse” : de viris illustribus Hierony-  
 mus auctor est. Romanus itaque Episcopus cum  
 sit ille, qui Petro in Pontificatu successit, jure et  
 merito in omnibus illi à Christo concessis prae-  
 rogativis successit. Ideo Romana Sedes caeteris  
 Ecclesiis dignitate et auctoritate praeeminet, at-  
 que nunquam esse desinet, nec qui in ea resi-  
 det, à fide, dum ex Cathedra loquitur defecit,  
 nec deficiet, ut experientia, et graviorum tes-  
 tium sententiis est compertum. Unum tantum  
 ex illis proferam, scilicet D. Agatonem, qui in  
 sua epistola ad Constantinum Imperatorem, quae  
 lecta et recepta sexta Synodo Generali apparet,  
 totus est, ut conficiat : „Haec est, inquit, ve-  
 „rae fidei regula quam et in prosperis, et in ad-  
 „versis vivaciter tenuit Apostolica Christi Eccle-  
 „sia, quae per Dei gratiam à tramite Aposto-  
 „licae Traditionis nunquam errasse probatur, nec  
 „Haereticis novitatibus unquam depravata sub-  
 „cubuit, quia dictum est Petro : Simon, Simon,  
 „ecce Satanas expetivit vos, ut cribraret sicut  
 „triticum, Ego autem rogavi pro te, ut non de-  
 „ficiat fides tua, et tu aliquando conversus con-  
 „firma fratres tuos. Hic Dominus fidem Petri  
 „non defecturam promissit, et confirmare eum  
 „fratres suos admonuit, quod Apostolicos Pon-  
 „tifices meae exiguitatis praedecessores confiden-  
 „ter fecisse, semper cunctis est agnitum.” Fabu-  
 lis ergo amandandae omnes toties decantatae Pon-  
 tificum defectiones, tanquam inventa prorsus de-

[ XXVIII ]

Irammentis plena, ab Haereticis, aliisque illorum infensissimis hostibus profecta : sicut etiam impudentissimum Anti-Christi nomen à Calvino, aliisque pestibus Summo Pontifici vaferrimè tributum. Sciant ergo, licet aegrè ferant, Christi Vicarium, Petrique succesorem, Romanum Pontificem nunquam in fidei, morum, facti dogmatici, et Sanctorum Canonizationis judiciis à veritate deviasse, nec deviaturum esse.

Ad Romanum etiam Pontificem ex universo orbe oppressorum recursus; ipsi factae in dubiis sive doctrinae sive disciplinae iteratae consultationes; graviorum causarum, ante et post factum in Provinciis judicium, relatio ejus supremæ jurisdictionis, et potestatis testimonia sunt apertissima; illis et leges condit, et canones exequitur, et ad eos reliquos in Episcopatu fratres cogit, judicat, sontes punit, omnesque Religionis controversias dirimit, et universa Primatus ejus munera exercet; ut semper, omnique aevo factum, et in Ecclesia est receptum, sicut cuique Ecclesiasticam historiam consulenti apparebit. Denique quidquid in suis Dioecesibus Episcopi singuli, in omni Ecclesia Summus Pontifex potest. Jure quoque sibi quaedam reservare valuit.

Attamen licet regimen Ecclesiae, ex dictis pateat, esse Monarchicum, cum in illo aliquis existat Superior, Romanus videlicet Pontifex, cui omnes parere teneantur; Aristocratia videtur temperatum. Nam etsi Episcopi illi debeant obedire : in suis Episcopatibus imperantes veri Ecclesiae Principes, et non illius Vicarii existunt; qui insuper in Conciliis fidei sunt judices, immo etiam



ante Papam, iudicio autem isti subordinato; et post illum extra Synodos, sed adhaesionis sententia, de fidei causis judicare queunt. Ideo opinionem illam, Episcopos suam jurisdictionem à Petri Successore, non vero à Christo immediatè accepisse asseverantem, velut Domini verbis minus consonam rejicimus: ait enim ille ad omnes Apostolos, suosque successores: (1) „Sicut misit me vivens Pater, et Ego mitto vos.”

## DE SANCTIS ECCLESIAE PATRIBUS.

Sextus Theologiae Locus Sanctorum Patrum auctoritas est, qui habet fidei testes puram ad nos transmissere doctrinam. Hinc quoties novi exorti sunt Haeretici, ad eos confutandos Episcopi suorum Praedecessorum opponebant suffragia: „In ipsa enim Catholica Ecclesia, inquit „Vincentius Lirinensis, (2) magnoperè curandum „est, ut id teneamus quod ubique, quod semper, quod ab omnibus creditum est.” Istorum auctoritatem, quam Haeretici, praesertim Lutherani, enervare nituntur, sancire et firmare nitamur. Patris enim Ecclesiae nomine is intelligitur, quem ob doctrinae praestantiam, vitae sanctitatem, vetustatemque convenientem Patrem Ecclesia ipsa suum tacitè vel expressè agnoscit. Ast horum quidem auctoritas pro rerum, de quibus scripsere, pro eorundemque, sive paucorum, sive multorum diversitate varia ipsa est. In Sa-

---

(1) Joan. c. 20.

(2) In Commonitorio c. 3.

erarum expositione litterarum unanimis illorum consensus, quoad fidei, et morum dogmata, quippe qui Sancti ipsius Spiritus sensus sit, argumentum praebet firmissimum. Sic Tridentinum decrevit Concilium : (1) „ Ut nemo prudentiae „suae innixus in rebus fidei et morum ad aedificationem doctrinae Christianae pertinentium „Sacram Scripturam ad suos sensus contorqueat, „aut contra eum sensum, quem tenuit, et tenet „Sancta Mater Ecclesia, aut etiam contra unanimem consensum Patrum ipsam Scripturam „Sacram interpretari audeat.” Quod omnes simul Sancti Patres unanimi consensu tanquam fidei dogma tradiderunt, id amplectendum. Quam circa rem iterum audiatur Lirinensis : „Necesse „est, ait, omnibus catholicis qui sese Ecclesiae „legitimos filios probare student, ut Sanctorum „Patrum fidei inhaereant, adglutinentur, immoriantur : profanas vero novitates detestentur, „horrescant, persequantur. Concilio enim Ephaesino divinitus placuit, nihil aliud posteris credendum decernere, nisi quod sacra sibi consentiens Sanctorum Patrum tenuisset auctoritas.” Unius, aut duorum Patrum etiam in his, quae ad doctrinam fidei attinent, effatum fidem facere probabilem potest, certam vero non valet; ideo contemnere impudentia : pro certo vero suscipere, imprudentia profectò esset; sicut omni laudes superior Vincentius peraptè ad rem loquitur : „Quidquid non unum, aut duos tantum, sed omnes pariter uno, eodemque consen-

„su, apertè, frequenter, perseveranter tenuisse, „scripsisse, docuisse cognoverit : id sibi quoque „intelligat, absque dubitatione credendum.” Omnium etiam consensus in eo genere quaestionum Theologicarum, quae fidem et mores non spectant, non certitudinem sed probabilitatem inducit. Quod quidem pro se testem idoneum, satis et gravem Lirinensem habet ajentem: (1) „Antiqua Sanctorum Patrum consensio non in „omnibus Divinae Legis quaestiunculis, sed „solum in fidei regula magno nobis studio et in „vestiganda est, et sequenda.” Plurium auctoritas certa, ac firma Theologo praestare non valet, si reliqui, licet, pauciores, reclamant: nisi fortè horum sententiam reprobarit Ecclesia, aut illorum probaverit. Quod ex eo ferè omnium iudicio Patrum efficitur, quod asserit, mundi hujus partes non eodem die omnes, sed multis editas, ornatasque fuisse, Augustino contra sentiente; cujus opinio ut probabilis in Ecclesia semper est habita. Patrum denique, sive multorum, sive paucorum dicta in scientiis naturae lumine cognitis certa argumenta praestare non valent, sed tanti facienda, quanti ratio naturae consentanea persuasserit. In his enim rebus non auctoritas, sed ratio dux, et magistra revera est. Qui insuper plura de hoc Loco desideret, emeritum Bonaventurae Argonensis de optima legendorum Patrum methodo librum adeat. Neque enim fas est, ut in his nos amplius immoremur.

---

(1) Lib. adv. profan. novationes.

## DE DOCTORUM SCHOLASTICORUM AUCTORITATE.

Hanc juniores contemnunt Haeretici, explodunt, exsibilant, maximè Lutherani, quorum haereses ab hoc fortasse fonte manarunt. Nam Scholae Theologis despectis, Patres, quos Schola sequitur praeceptores, neglexere; post Sanctos Veteres, Concilia; post ista Ecclesiam, Canonicosque libros aliquos ab illa ex Traditione receptos mirificè contempsere. Adeo verum est illud: „Qui spernit minima, paulatim decidet.” Nos autem contrà magni faciamus Scholam, ejus et placita suscipientes, et Theologos auscultantes. Sed ut certa procedamus methodo, aliquid de Scholasticae Theologiae origine loquamur.

Licet priscis temporibus non prorsus defuerint Systemata, licet imperfecta, Theologica: primus tamen, qui dogmata sacra in unum corpus coegit, remque Theologicam via et ratione, longèque commodiori ordine tradere coepit, saeculo octavo apud Graecos, tum in tribus Parallelorum libris, tum praecipue in quatuor Orthodoxae fidei, Joannes fuit Damascenus. In Occidente nonnisi sub finem saeculi undecimi Scholastica se prodidit per D. Anselmum, cujus libri eo ordine dispositi, quos eos P. Gerberonius digessit, Theologiae Scholasticae corpus sat justum exhibent. Saeculo vero duodecimo etiam nonnulli apud Latinos dogmata Theologica ex Sacra Scriptura, Patrum scriptis, Conciliorum decretis collegere, atque certo ordine, et singu-

lari methodo elaboraverunt: unde nata est nova Theologiam docendi ratio; quae, quia in Scholis recipiebatur, Scholasticae Theologiae nomen obtinuit. Sic se gessit inter alios Petrus Lombardus, Episcopus Parisiensis, cujus quatuor libri sententiarum extant, ideo earum Magister appellatus: hic tam apud Theologos celebratus fuit, ut in nullum, post Scripturam Sacram, plures commentatores extiterint. Attamen, cum tot commentaria in Magistrum scriberentur, sensim est factum, ut Theologia Scholastica, quae prius quaedam sententiarum collectio, et ordinatio solum erat, accedentibus Theologorum animadversionibus, et disceptionibus, plurimum cresceret, eique ex Dialectica ac Aristotelis Metaphysica non pauca miscerentur. Ast in meliorem ordinem digesta sunt, quae perturbatè satis Magister collegerat. Hoc prae caeteris praestitit D. Thomas decimo tertio saeculo edita Summa, quae aliorum ipsius librorum veluti compendium est, et specimen ingenii, adeo ut Scholasticae Theologiae princeps jure ac merito sit veneratus. A saeculi decimi sexti dimidio superioribus deformatam, ac deturpatam Scholae Theologiam etiam instaurare conati sunt doctissimi illi, saeculorum memoria digni, Bellarminus, Perronius, Petavius, Natalis Alexander, Tournelyus, coeteri tandem praeclarissimi, inter quos Hispanos nonnullos scitis recensendos. Sed quem ego Scholae Theologum appellabo? Eumne, qui inutilia, Theologiaeque indigna disserat, aut utilia quidem et digna per sese non tamen Theologicis, gravibusque momentis, sed vanis, imbecillibusque ratiun-

culis? Absit. Eumne igitur, qui quasi discordiae natus, partium studiis ducitur, tuncque optimum se gessisse Theologum judicat, cum suae sectae addictus adversus aliarum digladiatus fuerit alumnos? Minime gentium. Eum porro Scholasticum habeo et dico Theologum, qui de Deo, Divinisque rebus ex revelatione, scilicet Dei verbo tum scripto, tum tradito aptè, prudenter, doctèque disserat.

Scholae Theologia, quemadmodum à multis vitiis purgata tractatur, neque ignorantia veritatis est, nec inanis fallacia; nec Academiae Anti-Christi lupanaria, nec Lutetiae nata, nec profana Scholastica est, qua admissa, Evangelium obscuratum, et fides sit extincta, ut Lutherus Wiclefum imitatus, et Philipus Melancton mentiuntur. Ad horum, et similium cavillationes, et argutias eliminandas maximè utilem Scholae Theologiam vel ipsorum in eam odium, sibila, et probra satis ostendunt. Horum, de quibus in praesentiarum agimus, etiam multorum testimonium, si alii contrà pugnent viri docti, ad faciendam fidem non plus valet, quàm vel ipsorum ratio, vel gravior auctoritas comprobaverit: non enim haec numero, sed pondere judicantur. Ex illorum verò omnium sententia, in re quidem gravi usque adeo probabilia sumuntur argumenta, ut illis refragari temerarium sit, in quavis enim arte peritis credendum naturae ipsa ratio demonstrat. Concordem Scholae Theologorum de fide, aut moribus sententiam contradicere haeresi proximum: placitum quippe istorum nullum in iis rebus reperitur, quod Ecclesia, ip-



orum auctoritate mota, non teneat, non probet, non firmet.

Nec perfectum denique, absolutumque Theologum, nec suis numeris sufficienter instructum, qui Canonum scientia careat, Pontificum, et Conciliorum decreta personant passim. De juris autem Pontificii Prudentibus, hoc intelligi volumus : omnium auctoritatem in his, quae ipsorum propria sunt, magni esse faciendam, si quando circa ejusmodi res quaestio incidat.

## DE RATIONE NATURALI,

Auctoritatis loca, quae Theologiae propria esse diximus, ea alia sequuntur, quae ad rationem attinent naturalem, impropriaque nominantur. Ex quibus ipsa naturae ratio primus est Locus, isque satis et fecundus, et utilis, siquidem prout expedit, à Theologis usurpetur. In eo autem vitandi duo sunt errores extremi : eorum scilicet unus, qui rationibus, potiusve ratiunculis, syllogismisque contenti sic disputant, et scribunt, ut neque Scripturam, nec Concilia, nec Patres, nec reliquos internos, ac praecipuos Theologiae locos legisse, nosse videantur : „ non enim decet Theologos, qui gravissimis rebus, et maxime necessariis sunt occupati, „ Philosophiae studiis, plusquam par est, impediri.” (1) Alter contra illorum est error, qui sacris contenti litteris, aut etiam Patribus, non aliter argumentis naturae ratione innixis abhorr-

---

(1) Obstraet. dissert. 10. de Loc. Theolog. (2)

rent, ac si Theologiae adversa illa essent ac inimica. Cujusmodi praecaeteris sunt Lutherani; quorum dux Lutherus non Philosophiam modo, sed speculativas, reliquasque disciplinas errores esse, Theologoque inutiles et noxias petulanter asseveravit. Ast Theologia rationem humanam non abjicit, sed suscipit, et amplectitur. „Verum enim vero neutiquam opponitur,” ad rem Lateranense Concilium adversus Pomponantium inquiebat. (1) Fidei dogmata rationem non evertunt, sed superant : non eliminant, sed subijciunt : ideoque etsi non ut dominam, tamen ut ancillam recipiunt.

Perutilem, immò necessariam Theologo ad plurima naturae rationem existere quisque agnoscet, qui ea, circa quae ille versatur, expendat. Id etiam Patrum exemplo sapientiorum, et antiquiorum comprobatur : id Apostolorum factis, qui naturae rationibus exteros ad fidem adduxerunt, (2) confirmarunt fratres, (3) invitarunt dociles, repulerunt repugnantes. (4) Dominus denique ipse Jesus illâ est Saducaeis argumentatus. (5)

Sed in rationis, quoad Theologiam attinet, usu vitia duo, vel ab ipso Cicerone reprehensa, cavenda sunt maximè. Unum, ne incognita pro cognitis, incerta pro certis, exploratisque habea-

(1) Sess. 8.

(2) Act. 1. 3. 13.

(3) Hieron. in 8. Math.

(4) Joan. 9.

(5) Math. 12.

mus. Quā in re multum peccare multi solent; non aliter pro Thomae, Scoti, aliorumve opinionibus vel indiscussis, pugnantes, ac prae aris ipsis et focis. Alterum; ne inutilia tractentur; ut ab iis est factum, qui longo de rebus illis disseruere sermone, quae nec portare iuvenes, nec ferre senes valent : uno verbo, quaestiones vanas, obscuras, philosophandi barbarum aliquando usitatum genus, quaestionum monstra, verborum spectra, quae Pseudo-Scholastici adaman, declinemus. Itaque cum ex certis, exploratisque principiis certò, evidenterque ratiocinemur, firmum : cum ex probabilibus tantum probabile naturae ratio praestabit argumentum.

## DE PHILOSOPHORUM AUCTORITATE.

Non barbâ tenus, et pallio, sed egregios doctrinâ Philosophos inquirere Theologi munus est. Per magni enim habendi sunt veri Philosophi, ut eos Patres Hieronymus, Epiphanius, aliique habuerunt. Ex his quidam gravissimi etiam fuere Philosophi, sicut Justinus, Basilius &c. Et etiam multi Philosophorum dictis passim uti fuere, ut plurimorum scripta Patrum legenti apparebit. Paulus insuper Apostolus Arati, Euripidis, Epimenidis verbis uti non dedignatur. (1)

Philosophorum omnium una, eademque consensus philosophici dogmatis certam efformat fidem. Si enim tantum eorum auctoritas, qui artes alias profitentur, apud homines valet, ut in-

---

(1) Ep. 1. ad Cor. et ad Titum.

## [ XXXVIII ]

De non nisi temerè recedi soleat, multò id magis valere in Philosophorum unanimitate debet. Sed dum isti discrepant, Theologo magna cura est adhibenda, ut nulli Philosophorum sectae alligetur: tunc non auctoritas, sed ratio vincat. Eclecticam tamen philosophandi rationem, quae caeteris omnibus suâ ipsius naturâ praestat, à Theologis existimamus amplectendam.

Quoniam autem civile jus à naturae ratione, dum rectum est, proficiscitur, atque Philosophiae est conjunctum, à Theologo nullo modo judicamus esse alienum : immò magnam utilitatem ei, praesertim in moralibus, praestat, et plura alia argumenta probabilissima suppeditat : quippe in legibus etiam humanis Divinam voluntatem veneramur.

### DE HISTORIA HUMANA.

Ille Theologiae restat Locus, quem postremum constituimus reliquorum, Historiae videlicet humanae auctoritas. Hujus notitiam non perutilem modò, verum etiam quantum historicis rebus opus sit, Theologum esse versatum, vel illi abundè magno sunt argumento, qui ejus ignorance in varios prolapsi fuere errores, testis est locupletissimus D. Augustinus, qui ostendit, (1) nonnullos circa Scripturam errasse, eo quod ad historiae cognitionem illis aditus non pateret. Nec mirum : cum testè Cicerone, Historia magistra vitae sit, et lux veritatis. Ut autem quisque probè dignoscat, quantum auctoritatis humanae His-

---

(1) Lib. de Doctr. Christ. 2. c. 28. B. I. 1. 1. (1)

toriae sit tribuendum, tres, qui sequuntur Canones, praescribuntur. Primus esto ille : historicus, sacris exceptis, certus esse nullus potest : id est, eorum nemo unus certam in Theologia fidem facere valet. Est enim homo humanitus scribens, qui propterea et falli, et fallere potuit. Alter : historicorum, modo multi sint illi, et graves, nec perrara, et incredibilia narrent, auctoritas probabile satis Theologo suppeditat argumentum. Non enim est hominis benè instituti, et ad vitam humanam rectè confirmati viris fidedignis, quidpiam asserentibus credibile, minimè credere. Tertius : historicorum omnium in unum, idemque consentientium auctoritas, seu testimonium certam, firmamque facit fidem. Nam Senecae illud verum est : „Omnes scilicet nemi-  
„nem, nemo omnes, singuli singulos fallunt :” ecce autem tertii hujus canonis in Theologia usus : Petrum Roma et locasse sedem, et pro Christo martyrismum subiisse, historiae omnes graves conscribunt; unde tanquam ex principio certo, ac firmo certam illam, firmamque conclusionem conficiunt, quod nempe Romanus Episcopus Petro Summo in Pontificatu succedat.

Ut tamen verae à falsis historiae distinguantur, à Theologo consulendae sunt Criticae artis regulae, de quibus ad hanc usque diem innumeri prodierunt tractatus, à quibus recensendis hoc in Loco supersedimus, sicut et in aliis praecedentibus silentio praetermissimus terè universa, quae theses non constituunt : non enim haec institutionum, sed controversiarum more debuerunt pertractari. Atque ita praecipua ca-

pita sunt assignata, quae propugnanda putavimus. Sed ne fastidium lectoribus inferamus, operi finem imponimus : admonentes, quod si quid exciderit emmendatione indigum; universa Sanctae Romanae Ecclesiae, sapientumque judicio subijcimus libentissimè.